

Dr Mahathir belum tentu tanding PRU15

SINAR HARIAN

23 JULAI 2020

MOHD AZLIM ZAINURY

SHAH ALAM - Pengerusi Parti Pribumi Bersatu Malaysia (Bersatu) yang dipertikai jawatannya, Tun Dr Mahathir Mohamad masih belum membuat sebarang ketetapan akan bertanding atau tidak pada pilihan raya umum (PRU) akan datang.

Dr Mahathir yang merupakan Ahli Parlimen Langkawi berkata, walaupun hal itu masih belum dapat diputuskan, beliau tetap akan memainkan peranan yang besar pada PRU akan datang termasuk berkempen jika kesihatan baik.

"Jika saya berusia 98 tahun apabila diadakan PRU, sudah tentu akan ada kekangan fizikal, tetapi jika saya sihat, saya akan berikan sebanyak mungkin sokongan yang dapat," katanya ketika ditemu bual Melissa Goh dari ChannelNewsAsia semalam.

Bagaimanapun, bekas Perdana Menteri itu menjangkakan PRU tidak diadakan dalam tahun ini memandangkan sokongan majoriti yang diterima oleh kerajaan Perikatan Nasional.

Sementara itu, Dr Mahathir berkata, beliau juga akan mempertimbangkan untuk membentuk sebuah parti baharu sekiranya keputusan mahkamah tidak memihak kepada beliau dan empat ahli Parlimen lain berhubung penyingkiran mereka daripada Bersatu.

"Jika kami digugurkan, kami harus mempertimbangkan kemungkinan untuk menubuhkan parti lain," katanya.

Sebelum ini, Mahkamah Tinggi Kuala Lumpur menetapkan 7 Ogos sebagai tarikh keputusan mengenai permohonan Presiden Bersatu juga Perdana Menteri, Tan Sri Muhyiddin Yassin mengetepikan saman dikemukakan Dr Mahathir serta empat yang lain.

Dr Mahathir dan empat ahli Parlimen terbabit memohon untuk mencabar keputusan Bersatu menyingkirkan mereka daripada parti berkenaan.

Sementara itu, dalam temu bual yang sama, Dr Mahathir berkata, kerajaan Pakatan Harapan (PH) sebelum ini tidak mendapat sokongan yang mencukupi daripada orang Melayu.

Beliau berkata, hal itu kerana parti komponen PH iaitu Parti Keadilan Rakyat (PKR), Parti Amanah Nasional (Amanah) dan DAP kelihatan menumpukan usaha untuk mengangkat Datuk Seri Anwar Ibrahim menjadi Perdana Menteri.

"Selepas mengadakan perbincangan panjang dan berulang dengan DAP, Amanah dan PKR, perjuangan mereka nampaknya berpusat kepada usaha menjadikan Anwar (sebagai) Perdana Menteri. Ketika ini ada ramai orang yang tidak menerima dia (Anwar).

"Saya terlibat bukan kerana saya mahu menjadi Perdana Menteri, saya sudah dua kali menjadi Perdana Menteri dan cukuplah, tetapi ramai orang tidak memberi sokongan seperti itu kepada PH terutama apabila mereka melihat bahawa parti Melayu mereka tidak kukuh," katanya.

Beliau juga menegaskan bahawa kerajaan yang dipilih oleh rakyat pada PRU yang lalu diketuai oleh beliau dan bukannya Anwar.

"Kamu bercakap mengenai memulihkan kerajaan yang dipilih oleh rakyat. Kerajaan yang dipilih rakyat sebelum ini diketuai oleh saya, bukan Anwar. Jadi kalau kamu jadikan dia ketua, ia bukanlah kerajaan yang dipilih rakyat," katanya.

Ketika ditanya adakah jika Anwar perlu menyertai parti Melayu untuk membolehkan beliau menjadi Perdana Menteri, Dr Mahathir berkata, ia bukan suatu kemestian sebaliknya mesti mendapat sokongan daripada orang Melayu.

Namun, katanya, apabila Anwar meninggalkan UMNO, ahli politik terbabit telah membuat keputusan untuk menubuhkan parti pelbagai kaum dan menolak parti berasaskan kaum sebagai rasis.

"Anwar tidak dianggap sebagai protagonis bagi orang Melayu kerana dialah yang memulakan parti yang berbilang kaum dan ramai pemimpin dalam parti itu bukan orang Melayu. Orang Melayu sangat curiga terhadap parti bukan Melayu atau berbilang kaum," kata Dr Mahathir.

Mengenai tawaran sebagai menteri mentor daripada Anwar pula, Dr Mahathir berkata, beliau sebelum ini sudah ada pengalaman menjadi penasihat kepada beberapa Perdana Menteri, namun jawatan berkenaan seperti tiada fungsi apabila nasihat diberikan tidak diendahkan.

"Mereka tak mahu dengar. Mereka mahu bertindak sendiri, mereka mahu meninggalkan legasi sendiri.

"(Tun) Abdullah Ahmad Badawi dan (Datuk Seri) Najib Abdul Razak tak pernah dengar nasihat saya. Malah semasa dalam kerajaan sebelum ini, Anwar langsung tak mahu mendengar nasihat saya," katanya.

Mengenai hubungannya dengan bekas Timbalan Presiden PKR, Datuk Seri Mohamed Azmin Ali pula, Dr Mahathir berkata, perspektif politik bekas Timbalan Presiden PKR itu terlalu sempit dan hanya menumpukan perjuangannya melawan Anwar.

"Kamu patut berfikir untuk membangunkan negara. Kamu tak boleh hanya kerana kamu tak suka seseorang, kamu jadikan ia asas kepada semua tindakan kamu," katanya.

Ditanya sama ada beliau bersedia atau tidak bekerjasama dengan Mohamed Azmin, Dr Mahathir berkata, ia bergantung kepada cara Mohamed Azmin bekerja.

**© 2018 All Rights Reserved •Karangkraf Group Media • ©
2018HakciptaTerpelihara • Kumpulan Media Karangkraf**

Source: <https://www.sinarharian.com.my/article/93592/BERITA/Politik/Dr-Mahathir-belum-tentu-tanding-PRU15>